

Jonas

Nigpanlaguy si Jonas

1 ¹Nigdatong ka kinagian to Magboboot ki Jonas no anak ni Amitai no kagi: ²“Hondio ka to dakol no lunsud to Ninibi woy nangoni nu ka mgo otow dio no oglogparan ku sikandan tongod to nakita ku no mgo sao dan.”

³Di nasi atag nigpanlaguy no nigpamariu si Jonas to Magboboot, woy nigparoog sikandin to Tarsis. Nigtupang sikandin pohondio to Jopi woy duon naumaan din dio no barku no ogdoog to Tarsis. Takas no nigbadyad sikandin, nig-untud sikandin odyow to pogpamariu to Magboboot.

⁴Tagood no dio sikandan to dagat, nigpa-aap ka Magboboot to dakol no kaamag. Maagbot lagboy ka nigdatong no daldaa-ot woy inat ogkaguak on ka barku. ⁵Nanahallok ka tibon nigtarabau to barku woy kara sagboka kandan nig-umow to kandin no pigtuuhan. Woy intugdo dan ka mgo pig-aap dan diot dagat odyow no ogma-agkap ka barku.

Di si Jonas atag, nigloodlod diot diraom to barku, nighibat woy nalinoknok no nohirogo. ⁶Pighondiaan sikandin to igbudyag to barku no nignangon to, “Manio to oghidhirogo ka ro? Onow ka duon woy umowa nu ka koikow no pigtuuhan. Naugpa ogkohoid-uan ki rin odyow no kono ki ogkammatoy.”

⁷No nigmanangnangonoy ka mgo nigtarabau to barku no kagi, “Ogtitimao ki odyow no ogkatagaan ta ko hontow ka pugtian to soi no ingkabaybadyari ta.” Sikan ian ka pighimu ran woy ian natimao si Jonas.

⁸No nig-inso sikandan ki Jonas, “Nangoni koy nu, hontow ka pugtian to soini no ingkabaybadyari ta? Nokoy ka tarabau nu? Matig hondoi ka? Nokoy ka koot-otowan nu?”

⁹Nigtabak sikandin to, “Hibriu a woy nigsadyo a to Magboboot, no Igbudyag to langit no nighimu to dagat woy to tano.”

¹⁰Songo pignangonan sikandan ni Jonas no nigpanlaguy sikandin puun to Magboboot. Nanahallok lagboy sikandan to sikan woy nignangon to, “Otowoy! Nokoya sikan no pighimu nu?”

¹¹ Nasi no nigmaagbot ka daldaa-ot to dagat. Sikan ian nig-inso sikandan ki Jonas to, “Ogmonuon noy sikoikow odyow no oghagtong soi daldaa-ot kanami?”

¹² Nigtabak sikandin to, “Itugdo a now diot dagat odyow no oghagtong soi daldaa-ot su nataga a no sikoddi ka pugtian to poglopow kaniu to soi dakol no pogdaldaa-ot.”

¹³ Waro nigpannalinga ka mgo nigtarabau to barku ki Jonas, ko kono, nigpoomot sikandan to pogbogsoy to pogpalibong diot ilis to dagat. Di waro nohimu ran su nasi no nigmaagbot ka daldaa-ot.

¹⁴ Nigpannanoy sikandan to Magboboot no kagi, “Magboboot, kono koy nu porom oghimatadyi tongod to poghimatoy noy to soi otow. Kono koy nu ogsonditi to poghimatoy to otow no waro sao, hoo su pigbobootan nu man soini, Magboboot.” ¹⁵ No pighonat dan si Jonas woy intugdo dan diot dagat, woy nighagtong ka daldaa-ot.

¹⁶ To sikan, nanahallok lagboy ka mgo otow duon to Magboboot, woy nigpanubad sikandan to Magboboot woy nangulibot sikandan kandin.

¹⁷ Di, nigpa-aap ka Magboboot to dakol no isda no nig-aboong ki Jonas, woy dio si Jonas to gotok to isda sood to tatou no allow woy tatou no kausiloman.

Ka Pog-ampu ni Jonas

2 ¹ To duon si Jonas to gotok to isda, nigpannanoy sikandin to Magboboot no Igbudyag din no kagi,

² “To ingkabaybadyari ku, nig-umow a koikow Magboboot woy pigtabak a nu. To nakalobong a dio to diraom to kamatadyon, nigpangiak a no ogkabuligan a nu porom, woy nigpannalinga ka koddi.

³ Intugdo a nu dio to maraom, dio to taliwaro to dagat; piglingutan a to mabolbol no woig woy naop-lop a to mgo luak.”

⁴ Kagi ku to, “Waro ad on. Pigdogil a nud on to tangkaan nu woy kono kud on buwa ogkakitaan man do ka koikow no in-oog no baoy no tubaranan.

⁵ Naonod a diot maraom no kono a ogpakagogoinawa; nabodboran to lagut to dagat ka koddi’n uu.

⁶ Nalobong a to kadirauman to bubungan; nabunbunan a to tano woy kono ad ogpakalibuwas. Di piglokot nu ka ukul ku, Magboboot ku, ligkat to maraom no nalokoban a.

⁷“To ogkabigtawan ad on porom, naroromdoman ku sikoikow, Magboboot, woy pigdinog nu ka pog-ampu ku dio to in-oog no baoy no tubaranan nu.

⁸“Pig-iniugan to mgo otow no nigkopkop to mgo inotowotow no waro puus ka kohoy-u no ogkatinawo dan porom.

⁹Di sikoddi atag, og-uaging a no ogsadyo koikow. Ogpanubad a koikow woy ogtooron ku ka inpangulibot ku koikow. Koikow ro Magboboot ka puunan to kalipuwasan.”

¹⁰Woy pigsugu to Magboboot ka isda no ogluwoon din si Jonas diot ilis to dagat.

Nighondio si Jonas to Ninibi

3¹Nighutuk man do niglopow ka kinagian to Magboboot ki Jonas no kagi, ²“Hondio ka diot dakol no lunsud to Ninibi woy nangoni nu sikandan to igpanangon ku koikow.”

³No nigbabali si Jonas to Magboboot woy nighondio sikandin to Ninibi. No kuntoon, mau-ag lagboy no lunsud ka Ninibi – tatou no allow ko oghip-hipanowan soi. ⁴To an-anadyan no allow, nigbunsud si Jonas to poghip-hipanow diot lunsud woy nignangon-nangon sikandin no kagi, “Kohop-atan no allow naan do woy oglogparan ka Ninibi.” ⁵Nigtuu ka mgo matig Ninibi to Magboboot. Nighagtong sikandan tibo to pogkoon, agad ka nawaraan woy ka naruonan, nanginabo sikandan to saku to pogpapatow to pogsondit dan.

⁶To nakarinog ka hari to Ninibi to sikan, nighasindog sikandin ligkat to trunu? rin, pigluung din ka kandin no marodyow no kinabo, woy nigsau-ub sikandin to saku woy nigpinnuu to atigbun. ⁷No nigpa-aap sikandin to poitaga to tibo no duon to Ninibi no kagi,

“Soi ka sugu no ligkat to hari woy to mgo igbudyag no duma rin: Dokow pakoona ka tibo, agad otow woy ko adyam; waro agad hontow no ogkoon woy ko og-inum. ⁸Pasau-uba now atag to saku ka tibon otow woy adyam. Kara otow, po-umowa duon to Magboboot to tibon goinawa rin. Woy ongkori now ka mgo maroot no daan woy hinimuan now. ⁹Naugpa ogkohoid-uan ki to Magboboot woy ogkobalbaw ka kandin no kabou kanta odyow no kono ki ogkammatoy.”

¹⁰To pogkakita to Magboboot to pighimu ran woy to pog-iniug dan to karootan dan; nohoy-u sikandin kandan woy waro din toora ka logpad no pigbabantaan din.

Nabou si Jonas to Magboboot

4 ¹Di niglangot si Jonas tongod to sikan woy nabou sikandin. ²Nigpanabisabi sikandin to Magboboot no kagi, “Pitow ka Magboboot no Igbudyag, soini ian ka inkagi ku to dio a pad to kanami’n ugpaan. Sikan ian no nig-agpas a no nigpanlaguy to Tarsis su nataga a no moid-uon ka no Magboboot, mananoy ka ogkabou woy dakol ka goinawa nu no kono nu igparagas ka logpad nu. ³No kuntoon, Igbudyag ku, hawia nud ka ukul ku su madmarodyow pad no ogkamatoy a woy to ogkoudyag a.”

⁴Di nigtabak ka Magboboot to, “Manio to nabou ka? Litos bua no ogkabou ka?”

⁵Niglibuwas si Jonas woy nigpinnuu sikandin dio to ogsilaan to lunsud. Nigtutukbung sikandin woy dio sikandin nigpinnuu no nigpohoung odyow to pogpitow ko ogkoomonu ka lunsud.

⁶No duon pinamua no inpatubu to Magboboot to longod ni Jonas odyow no duon ogkohoungan din. Narago lagboy si Jonas to soini. ⁷Di to pogkapawo, nigpa-aap ka Magboboot to uod-uod no nigkoon to pinamua woy naanos soini. ⁸To pogsilo to allow, nigpa-aap ka Magboboot to moinit lagboy no kaamag no nigligkat to ogsilaan. Narampil si Jonas to koinit to allow woy nigmautoy on sikandin. Nigkoiniat sikandin no ogkamatoy woy kagi rin to, “Madmarodyow pad no ogkamatoy a woy to ogkoudyag a.”

⁹Di kagi to Magboboot ki Jonas to, “Litos bua no ogkabou ka tongod to sikan no pinamua?”

Nigtabak si Jonas to, “Hoo, litos ian! Nabou a lagboy woy ogkoiniat a no ogkamatoy.”

¹⁰Di kagi to Magboboot to, “Nohimonow ka to sikan no pinamua di waro man inkoirapi nu to sikan woy kono’n sikoikow ka nigpatubu. Nigtubu do duon to songo kausiloman woy namatoy to songo kausiloman. ¹¹Di ka Ninibi, duon labow pad to 120,000 no otow no waro mataga ko nokoy ka marodyow woy ko nokoy ka maroot, woy songo moon-ing ka mgo adyam duon. Kono bua no litos no ogkohimonowan ku soi dakol no lunsud to Ninibi?”